



Juliane Henningsen  
Inatsisartunut ilaasortaq

**Imminut toquttarnerup pinaveersaartinnaasanut tunngatillugu § 37  
tunngavigalugu 258/2013-mi Inatsisartunut ilaasortamit Juliane Henningsen,  
Inuit Ataqtigiinniit apeqqummut akissut.**

06-01-2014  
Sags nr. 2013-093698  
Dok. nr. 1431511

Inatsisartunut ilaasortap apeqqutaanut qujavunga:

Postboks 1160  
Tlf: 34 50 00  
Fax: 34 55 05  
3900 Nuuk  
Email: pan@nanoq.gl  
www.naalakkersuisut.gl

1. Nunatsinni imminut toquttarnerup pinaveersaartinneqarnissaanut periusissiaq Inatsisartunut saqqummiunneqaqqammersoq sunik tigussaasunik, suliniutinik aallartitsinermik kinguneqarpa?
2. Oqarasuaatikkut ulloq unnuarlu saaffissamik pilersitsisoqartariaqarneranik, Inatsisartuni partiit tamarmik isumaqatigiinnerat, Naalakkersuisut qanoq qisuariarfigaat?
3. Ulloq suna aallarnerfigalugu innuttaasut imminut toqunnissaminnik ulorianartorsiortut saaffissaaleqisullu oqarasuaatikkut saaffiginnissinnaangussappat?
4. Naalakkersuisut Nunavut-mmiut iliuusaattut "Embrace Life Council"-ilitut ittumik piler-sitsilersaarnarlutik?
5. Imminut toquttarnermut pinaveersaartitsineq suliassaqaarfittut sumi inissisimava, kiisalu sulisoqarnikkut qanoq pilersaaruteqarfigineqarpa?
6. Imminut toquttoqartillugu, inoqarfinni qanigisaasunut aalajangersimasunik peruseqar-toqartarnissaanik Naalakkersuisut tigussaasunik pilersaaruteqarpat?

**1-imut.** Nunatsinni imminut toquttarnerup pinaveersaartinneqarnissaanut nuna tamakkerlugu 2013-2019-mi periusissiaq siunissami pinaveersaartitsilluni sulinissamut pingaarnertigut toqqammavissiivoq. Periusissiap saqqummiunneqarnerata kingorna periusissiami taaneqartut pinaveersaartitsinermi suliniutinut arfineq marlunnut tamanut iliuusissanik pilersaarusiortuni sulisoqassaaq. Sulineq taanna 2014-ip aallartinnerani aallartinneqassaaq.

**2-mut.** Naalakkersuisut imminut toquttarnerup pinaveersaartinnaasanut suliniutinut tamanut tapersersuippat, kisiannili oqarasuaatikkut ulloq unnuarlu saaffissamut naleqqiullugu pisariaqartitsinermik, sunniutaanik kiisalu aningaasaqarnermik misissuinissaq paasiniaanissarlu pisariaqarluni.

Maannakkorpiaq peqqinnissaqarfiup ataani nuna tamakkerlugu oqarasuaatikkut saaffissaqarpoq (Meeqqanut oqarasuaat 134, Attavik 146 aamma ilaqutariinnut siunnersuisarfik 324252) kiisalu oqartussat allat ataanni oqarasuaatikkut siunnersuisarfippassuit. Peqqinnissaqarfiup ataani nuna tamakkerlugu oqarasuaatikkut saaffiginnittarfiit ullormut katillugit nalunaaquttap akunnerini marlunni ammasarput ukiumullu 500.000 kr.-inik akeqarlutik. Ammasarneri 1200 %-imik annertusineqassappata tamanna maannakkut aningaasatigut sinaakkutigisat iluanni naammassineqarsinnaanngilaq, kisiannili imminut toquttarnerup pinaveersaartinnissaanut aningaasanik amerlanernik qaffaavigineqarnissaa pisariaqassalluni. Inaarutaasumik aalajangiisoqartinnagu suliniutip taassuma sukumiisumik misissorneqarnissaa taamaattumik Naalakkersuisunit kissaatigineqarpoq.

Aammattaaq Naalakkersuisunit malugeqquneqarpoq imminoriataarsinnaasut taakkulu ilaqutaat ikiorniarlugit ulloq unnuarlu maannakkut neqerooruteqareersoq. Oqarasuaatikkut siunnersuisarnerup nalinginnaasumik ammasarfiata avataatigut ikiortissarsiorluni ulloq unnuarlu politiit peqqinnissaqarfillu attavigineqarsinnaapput.

**3-mut.** Soorlu qulaani allaaserineqartutut inaarutaasumik aalajangiisoqartinnagu taamatut pinaveersaartitsilluni suliniutissap Naalakkersuisunit sukumiisumik misissoqqissaarneqarnissaa kissaatigineqarpoq.

**4-mut.** Embrace Life Council suliniuterpasuarnik aallartitsinikuuvoq taakkulu ilarpassui Nunatsinni imminut toquttarnerup pinaveersaartinnissaanut 2013-2019-mi periusissiami Naalakkersuisunit siunniunneqartut suliniutit assigalugit. Naalakkersuisut taamaattumik Nunavumi isumassarsiasiat suliallu tikilluaqquvaat taakkulu ilai iliuuseqarnissamut pilersaarutini sulinermut ilanngutissallugit.

Erseqqissaatigineqassaarli periusissiaq saqqummiunneqartoq imminut toqoriartarnerit pinaveersaartinnissaannut immikkut sammitinneqarmata nalinginnaasumillu eqqarsartaatsikkut peqqissuunerup siuarsarnissaanut samminatik. Imminut toquttarnerit pinaveersartinnerisa saniatigut aamma pilersaarutit sulissutigineqarput, meeqqat inuusuttullu akornanni eqqarsartaatsikkut peqqissuunermik pitsaanerulersitsisussat. Tassani siunertaq tassaavoq meeqqat inuusuttullu iliuuseqarnissamut periarfissaat aamma inuunerup ingerlanerani aporfigisartakkanut qajannaassuseq pitsaanerulersissallugu.

**5-mut.** Imminut toquttarnernik pinaveersaartitsineq peqqinnissaqarfimmiit kiisalu kommuniniit aallaaveqarpoq.

Peqqinnissaqarfimmi suliniut tarnikkut nappaatillit pillugit immikkoortumi aqutsisunut atasuni inini naleqquttuni inissinneqarsimavoq tassaniillutik suliniutini ataqatigiissaarisoq aamma siunnersorti.

Tarnikkut nappaatillit pillugit immikkoortumi aqutsinermi imminut toqoriartarnernik pinaveersaartitsinerik nukittorsaalluni inerisaalluni ingerlaavartumik sulisoqarpoq.

**6-mut.** Nuna tamakkerlugu imminut toquttarnernik pinaveersaartitsineq immikkoortoq 4.1.1-imi kiisalu immikkoortoq 4.6.1-imi allaaserineqarpoq sumiiffinni upalungaarsimanissamut pilersaarusionerit kiisalu malitseqartitsineq aamma ilaqtanik qimatanillu saaffiginninnerit qulakkeerneqassasut. Taamaalilluni saaffiginninnissamut periarfissat kiisalu ilaqtannut tapersersuinerit ikiuinerillu 2014-p aallaqqaataani aallartittunut iliuseqarnissamut pilersaarutinik sulianut ilanngunneqassallutik.

Inussiarnersumik inuulluaqqusillunga  
Med venlig hilsen

  
Steen Lyngø